


येधर्मा गाथाया

[अर्थ सहितं]



(श्री स्वयम्भू शर्ण)

लेखक :

बज्राचार्य पं. रत्नबहादुर

ये धर्मा गाथाया

[अर्थ सहितं]

लेखक :

बज्राचार्य पं. रत्नबहादुर

बुबहाल धपगाल, तःज यल ।



प्रकाशक :

गुणरत्न शाक्य

नकबहिल टोल, खच्छे यल ।



संरक्षक :

पूर्णबहादुर बज्राचार्य

बुबहाल धपगाल, तःज यल ।



नेपाल सम्बत् १०९३

बिक्रम सम्बत् २०२९

चू. १७८६

प्रकाशक :

गुणरत्न शास्त्री

नकबहिल टोल, खाछेँ यल

(सर्वाधिकार संरक्षक याके सुरक्षित)

प्रथम संस्करण २०००

थाकूर:—

बागमती छापाखाना

गाबहाल टोल, बनबहाल यल ।

प्राक्कथन

सम्यक्संबोधि ज्ञानं विभूषितं जुया बिज्याह्य,
निपा तुति दुपि मध्ये श्रेष्ठह्य,

श्री शाक्यमुनि बुद्धयात् साष्टाङ्ग प्रणाम ।

प्रिय पाठक महानुभावपि !

दँ बदं मदुवं हानं छलपेलपिनिगु समक्षे थुगु
'ये धर्मा गाथा' नामक सफू पिकया देछाय् दुगुलिं लय्
ताय्गु छगू स्वाभाविकगु खँ खः ।

थुगु 'ये धर्मा गाथा' स्वेबले चिकिचा हाकगु गाथा
जूसानं बुद्धया सम्यक्वाणि पिज्वगु बुद्ध बचन मध्ये
बौद्ध दर्शन दुथ्याना च्वंगु सर्वश्रेष्ठगु गाथा खः ।

छगू समये श्री शाक्यमुनि बुद्ध वेणुबन महाबिहारे
बिहार याना बिज्यागु इले छन्हु छुं दिन न्ह्यो प्रब्र-
जित जुया बिज्याह्य अश्वजित भिक्षु भिक्षाटन यायां
राजगृहया लँय् बिज्याना च्वंबले (उपतिष्य) शालिपुत्र
परिव्राजकं व सुशान्त दान्त शौम्य श्रमण अश्वजितयात्
यानंनिस्ये खन । अले शालिपुत्र परिव्राजकं बिचारयाना
बिज्यात् कि-हुँ बिज्याह्य शौम्य श्रमणयागु ज्ञान अब-
श्यनं बिरज बिमलगुहे ज्वीमा धैगु मने तया अश्वजित
या भिक्षाटन याय्गाका लिहाँ बिज्याय् त्यंबले शालि-

पुत्रं अश्वजितया न्ह्योने बिज्याना बिनम् पूर्वक थथे
न्यना बिज्यात ।

हे आयुष्मान ! छःपिनिगु धर्म छु खः ? छःपिनि
गुरु सु खः ? जित आज्ञा दय्का बिज्याहुँ धका न्यना
बिज्याबले अश्वजित भिक्षुं लिसः बिया बिज्यात ।
जिमि गुरु शाक्य कुलया मणि गौतम बुद्ध खः, जिमि
गुरुं कना बिज्यागु धर्म थवहे खः कि न्यना बिज्याहुँ ।

“ये धर्मा हेतु प्रभवा हेतुस्तेषां स्तथागतः

ह्यवदत्तेषां च योनिरोध एवंबादी महाश्रवणः”

थुगु गाथा न्यने मात्रनं शालिपुत्र परिव्राजक अत्यन्त
हर्षयाना थुलथुल आयुष्मान् ! छःपिनिगु संक्षिप्त बचन
याकें जि अत्यन्त प्रभावित जुल धका बिनम् पूर्वक
अभिवादन याना थः हितैषि मित्र (कोलित) मौद्गल्या
यनयात नापला बिज्यात ।

हे मित्र मौद्गल्यायन ! झीत बिरज बिमलगु धर्म
उपदेश बिया बिज्याइम्ह शास्ता गुरु लुल, नु याकनं
सञ्जय परिव्राजक याथाय् वना बिदा कावने धका
निम्हं संजय परिव्राजकया आश्रमे वया थथे धैबिज्यात—
हे संजय ! जिपिजा गौतम याथाय् वना प्रब्रजित जूवने
त्यल, छिपिनं वेसा वा, जिपिजा वन । अले इपिनाप

अनर्चर्वापि २५० म्ह परिब्राजकपिन वेणुबन पाखे स्वया नाप वन । वेणुबने थ्यनेवं श्री शाक्यमुनि बुद्धयात साष्टांग प्रणाम याना जिमितनं प्रब्रजित याना बिज्याहुँ धका बिनम्र पूर्वक बिनति यात ।

श्री शाक्यमुनि बुद्ध उखुनुया दिनेहे शालिपुत्र तथा मौद्गल्यायन सहित (२५०) परिब्राजकपिन्त प्रब्रजित याना बिज्यात । थुपि शालिपुत्र व मौद्गल्यायन बुद्धया जीवन पर्यन्तं अग्रश्रावक जुया श्रावक, प्रत्येक, महायान तकया धर्म देशना न्यना वयाच्चंगु बौद्धधर्म सम्बन्धि पुस्तकं न्व्वानः च्वंगु दु । नाप थुगु 'ये धर्मा गाथा' अपालं बौद्धग्रन्थे पुस्तक समाप्ती उल्लेख जुयाच्चंगु दु ।

प्रस्तुत पुस्तकया च्वमि जिम्ह पूज्य पिता बज्राचार्य पं. रत्नबहादुरजु खः । थुगु 'ये धर्मा गाथा' बौद्ध धर्मप्रति अगाढ श्रद्धाभावदुपि महानुभावपनिगु लागी अतन्त उपयोगी ज्वी धैगु खना ।

अन्तय् थुगु पुस्तक पिकाय्त माःगु आर्थिक अवि-
भार कुबिया प्रकाशक जुया बिज्याम्ह श्री गुणरत्न
शाक्ययात जिगु दुनुगलंनिस्ये धायबाद दु । अस्तु—

पूर्णबहादुर बज्राचार्य
बुबहाल धम्माल, तःज यल ।

हे गुरु बुद्ध

हे गुरु बुद्ध छलपोलया शरणे,
दण्डवत जिमिसं छलपोलया चरणे ।
छलपोल गुरु करुणाया खानि,
प्राणिजन पित्त दया तयेगु बानि । ॥ १ ॥

श्व भव चक्रे गुलि दु प्राणि,
प्राणिपनि जुया बिज्याकम्ह स्वामि ।
याय छलपोलया पूजा अज्ञानि,
श्रद्धा जिमि फुथ्ये धूपदीप आदि । ॥ २ ॥

यायत्यना बिनति जिपि अज्ञानी,
क्षमा यायमाल अपराध आदि ।
गन गन बुद्धया उत्सव याय्गु बानि,
अमिगु धर्म खना अनुमोद यामि । ॥ ३ ॥

हे गुरु बुद्ध जिपि पापि तेत,
धर्मचक्र यावने मोक्षगति वेत ।
प्रार्थना याना तथागत पिके,
कल्पकल्प बिज्याहुँ निर्बाण मजुस्ये । ॥ ४ ॥

थुगु अस्तुतिया छुं पुण्य दतसा,
जुयावेमा बोधिचित्त सर्वसत्त्व प्राणिया
प्राणिपनि पवीमा दुःखया भय,
इति श्री जगत प्राणिया जय । ॥ ५ ॥



बज्राचार्य पण्डित रत्नबहादुर
बुबहाल टोल धपगाल, तःज यल ।

*

ॐ नमो रत्नत्रयाय ॥

ये धर्मा हेतुप्रभवा
हेतुस्तेषां तथागत ।
ह्यबदत्तेषां च योनिरोध
एवंवादी महाश्रवणः ॥

-अस्यार्थ-

ये धर्मा इति. ये धर्माः यङ्कारेण वायुः
अकारेण चन्द्रः ईकारेण कामः वायुचन्द्र
कामात्मका धर्माः हेतुप्रभवाः महाशून्ये ॥

वायु, चन्द्र, काम, थ्व र्वङ्गूयात आत्म धर्म धाये,
थ्व धर्म धयागु संसार छु ? हेतु प्रभवाः-हेतुनं
उत्पत्ति जुल महाशून्ये । आकाशे अनाधारे
वायुरुत्पन्न महाशून्य-अनाधार आकाशे वायु
उत्पन्न जुल । सांसारिक हेतु वायु-सांसारिक हेतु
धाये । चन्द्रोऽपि कामधेनु-चन्द्रमां काम हेतु ।

कामादिभिर्जना लह्यादकृत्वात्-काम आदि
जन लोकायात सुख बिया च्वंगु । तत्त अन्नाधारे
मन्नसि काम उत्पन्नः-उगु अनाधारगु मनस
काम उत्पत्ति जुल । प्रवृत्ति हेतुः-प्रवृत्ति धैगु छु
धाःसा-जन्म, जरा, मृत्यु, जन्म ज्वोगु, बुढाज्वोगु,
मृत्यु ज्वोगु । तस्य हेतुः-श्व स्वतायात प्रवृत्ति हेतु
धाय् । तेसर्वे हेतु प्रभवः-थुपि सकल हेतुन
उत्पत्ति जुल । प्रवृत्ति निवृत्ति ततो वायु
रुत्पन्नः-प्रवृत्ति निवृत्ति धयागुलि बायु उत्पत्ति
जुल । वायु हेतुतोग्नि-बायुया हेतुन अग्नि उत्प
त्ति जुल । तत् हेतुतोजल-अग्निया हेतुन लंख
उत्पत्ति जुल । पृथ्वी हेतुतोजल-लंखया हेतुन
पृथ्वी उत्पत्ति जुल । सुमेरु हेतुतो पृथ्वी-सुमेरु
या हेतुन पृथिवि उत्पत्ति जुल । स्वर्ग हेतुतो
सुमेरु-स्वर्गया हेतुन सुमेरु उत्पत्ति जुल । देवहेतु
सुमेरु-देवया हेतुन सुमेरु उत्पत्ति जुल । अमृत
हेतु देवा-अमृतया हेतुन देव उत्पत्ति जुल । मृत्यु
हेतु अमृत-मृत्युया हेतुन अमृत उत्पत्ति जुल ।
जन्म हेतु मृत्युः-जन्मया हेतुन मृत्यु जुयगु ।
तेषां हेतु स्तथागत - थुगु हेतु यात तथागत

धाये । यथायेन प्रकारेण आगत-गुगु प्रकारं
जन्म जुयावल । तथातेन प्रकारेण गत स्तथा
गत-शुगु प्रकारं मरण जुया वंगु यात तथागत धाये ।
आकाशे मेघवत्-आकाशे सुपांश्वर्थे । तेषां
प्रवृत्तिहेतु भवानां धर्माणां-शुगु प्रवृत्ति हेतु
न उत्पत्ति जूगु धर्मयत् । संसारिकाणां योनि-
रोध-संसारिक धर्म धाय् । निरोध धैगु संसार चक्र
हितुहिला च्वंगु । बंधन निवृत्त्यात्मक-बंधन
यानातःगु गुम्हसिया निवृत्ति आत्म लिचिला । एत-
त्सद्धर्महि-प्रवृत्ति निर्वाण वनेगु सद्धर्मया कथा ।
निश्चितं अवदत्-निश्चयनं आज्ञा दयेकल ।

अविद्यादिकान्-अविद्या आदिः-संस्कार,
मिथ्यादृष्टि, नामरूप, षडायतन, संस्पर्श, बेदना तृणा,
उपादान, भव, जाती, जरा, मरण । श्व द्वादशाकार
धर्मचक्रया कथा । हेतु प्रभवान्-हेतुनं उत्पत्ति
जुल । धर्मा निरुध्य-शुगु धर्म संसारयात निरोध
धाये । आर्याष्टाङ्गादिकं मोक्ष प्रापक-
आर्याष्टांग मार्ग आदि च्यागू शीलयात पालन याना
मोक्ष वनेगु तधंगु धर्म । सम्यक् दृष्टि, सम्य वसंकल्प,

सम्यक् वाक्, सम्यक् आजीव, सम्यक् व्यायाम, सम्यक् स्मृति, सम्यक् समाधि । अत्र च्याता प्रकारया उपोषध ब्रतग्रादिं सद्धमं । चराम्यहं चरथ यूयंमितिवा -सद्धर्मस चलेयाना निर्वाण पद लाय्गु । ऊहा श्रवणः श्रवण नायकः-महा श्रवण धयाम्ह महा श्रवणया नायक जुया बिज्याकम्ह । शाक्यराट्— श्री शाक्यसिंह भगवानं । एवंवादी-एवं धाये थुगु कथं । वादि - आज्ञा दयेकल ।

इत्येक पक्ष ॥ १ ॥

यद्वा हेतुस्तेषां स्तथागत इति हानं
 उलि हेतुया कारणं उत्पत्ति जूगु तथागत धाय् । तेषां
 हेतु भवान्तां संसारिकाणा-थुगु हेतुया कारणं
 संसार उत्पत्ति जुल, संतानया कारणं भोग उत्पत्ति
 जुल । धर्माणां अपि तथागतः - धर्म धयागु
 षट्गति संसारयातनं तथागत धाय् । बुद्धयात भगवान्
 धाय्, गथ्ये धाःसा-निवृत्त्यात्मकः-निर्वाण जुया
 बिज्याकम्ह । सम्यक्संबुद्ध महाबैरोचनः सम्यक्संबुद्ध
 नाम महाबैरोचन बुद्ध । पुजःइग्धवर्त्तिकानलेन
 प्रवृत्ति धर्मे छु इता च्याका तयागु मतया स्वरूपं तेज
 प्रवृत्ति जूगु । पंचज्ञानात्मका स्तथागतान्-
 पंच ज्ञानया आकारणं पंचबुद्ध उत्पत्ति जुल । निर्मि
 त्तवान्-संसार दय्केया कारणे । तैरपि समन्त
 भद्रादयः - थनंति समन्त भद्र आदि बज्रपाणि,
 रत्नपाणि, पद्मपाणि, बिश्वपाणि । पंचात्मजा-
 न्नातसा - न्याम्ह मानव पुत्रयाना । बोधिसत्त्वा
 निर्मिता-बोधिसत्त्व दयकेया कारणे सृष्टि यात ।
 तत पद्मपाणिनामा बोधिसत्त्व-थन पद्म-
 पाणिनाम बोधिसत्त्वं । त्रिशुणाभिज्ञः पंचात्मकः

सत्-लोक संसर्जन धैगु समाधि याना । ब्रह्मादयो
निर्मिताः - संसार दयकेया कारणे ब्रम्हा आदि
सृष्टि यात । तत्तः सांसार प्रवृत्ति रागताः -
थन संसार प्रवृत्ति जुल । तस्मात्तथागत एव
हेतुः - थुगु तथागत हेतु जुल ।

इति द्वितीय पक्ष ॥ २ ॥

यद्वा ये धर्माः—हानं अधर्मं धयागु । अकार
 प्रश्लेषान्—अकार प्रश्लेषण याता । हिंसालोभा
 द्यापापः—हिंसा लोभ आदिं दक्व पाप । लेपि हेतु
 प्रभवाः—श्व दक्व हेतुनं उत्पत्ति जुल । क्रोध
 प्रभवहिंसा कायकं त्रिविधं कर्म इत्यादि—
 हिंसा याय्गु, शरीरं याय्गु पाप स्वता ३, प्राणिपिन्त
 हिंसा याय्गु । अदत्तादान-अदत्तादन काय्गु ।
 कामनिथ्याचार—परस्त्री मिथ्याभोग । मत्त
 शिक्षा, वाचिक पाप, पैशुन्य, फस्ताखँ ल्हाय्
 गु । विघातसूला-छोखँबुखँ ल्हाता ज्वीगु । क्रोध
 सूला-छाक वचन तथा ज्वीगु । मनोरथविघा-
 तिनी—जाना च्वंपिन्त फाया बीगु । मानसिक पाप
 धैगु—अभिठ्या-मेवया धन द्रव्यस लोभ याय्गु ।
 व्यापाद-मेवयात द्रोह याय्गु । मिथ्यादृष्टि, नास्ति
 भाव । इत्यादयो धर्माः—शुलि आदिं अधर्म
 धयागु । हेतुसंभवा—हेतुया कारणं उत्पत्ति जुल ।
 लेषांहेतुस्तथोगतः—शुगु हेतुयात तथागत धाये ।
 तथा पूर्व प्रकारेणैवागतः—श्वथे न्हापायागु

प्रकारं तथागत उत्पत्तिजुल । तेषांमधर्माणां निरो
ध बंधन-धुगु अधर्म यात बंधन याता । दृष्टाकुष्ठा
लानि बंधन-दशा कुशल इत्यादिं पापयात बंधन
याता । अब्रह्मत् सहाश्रवणः-महाश्रवण जुया
बिज्याकम्ह श्रो शाक्यसिंह भगवानं आज्ञा दयूका बि-
ज्यात । यस्तथागतस्तथता क्रमेण आगतः
तथागत धाय, तथता धैगु क्रमनं बिज्याकम्ह ।
तथता नाम-शून्यताज्ञान, तथता धैगु शून्यताज्ञान
बिचार याता । तविचार्य लौकिक लोकोत्तर
ज्ञानमवाप्य-लौकिक लोकोत्तर धैगु श्व नित
बिस्तार पूर्वकं ज्ञानया खँ सीका । पारमितादि-
दान पारमिता आदिं दश पारमितास चले याता
बिज्यात ।

दशपारमिता धैगु गथ्येधाःसा-न्हापा न्हापा जुया
बिज्याकम्ह सकल भगवान् तथागत मुनिइवरपिसं श्व
संसार धैगु अनित्य दुःख धका सीका दको माया त्याग
याता राज्य मुलुक धनसंपत्ति छेँ बुँ पुत्र-पुत्री आदि
श्वगु शरीरया लाहि आत्मा समेतं त्यागयाता सर्वसत्त्व
प्राणियात समान खना दया करुणा तथा प्राणिपिसं

गुगु गुगु इच्छा याना फोन उम्हसयात उगु उगु बस्तू
 इच्छा पूर्णज्वीक दान याना बिज्यात, थथिगु दान पार
 मिताया बलं बुद्ध भगवान्पि सकलं अनित्य दुःखगु
 संसाररूपि सागर ससुद्रं पार जुया थाहां बिज्याना महा
 मोक्ष सुखलाना बिज्यात । श्व दान पारमितास चले
 याय्गु स्वंगू कंठ दु । छुछुधाःसा-इच्छादान, ज्ञानदान,
 धर्मदान, इच्छा दान धयागु थःके दुगु थमं फुगु पात्र
 बिचार याना अन्न बृंहि वा जाकि आदि अन्न बस्त्र
 तिसा वस क्षे^० बु^० धन द्रव्य मित्रां खने दुगु बस्तुयात
 त्यागयाना बीगु । १। हानं ज्ञानदान धैगु थमं सयका
 तयागु सीका तयागु ज्ञान गुण बिद्या आखः स्यनाबीगु
 इलम ज्या स्यनाबीगु आदि थः सःगु गुण प्रकाश याना
 बीगु । २। हानं धर्मदान धयागु गथ्येधाःसा-श्व संसारे
 च्वनाच्चपि षट्गति देव दैत्य मनुष्य तिर्यक प्रेत नरक
 श्वते खुगू गतिस बासयाना च्वपि जन्मजन्मान्तरयापि
 मां-अबुपिगु दुःख लुमंका अमि याकनं थःथःगु दुःखं छुते
 जुया बोधिज्ञान लाना सुखाबति भुवनस बास लाय्मा
 धका बोधिचित्त उत्पत्ति याना त्रिरत्न बुद्ध बोधिसत्व
 पिनिगु शरणे च्वना जपत्तप ध्यान समाधि पाठ पूजा
 दानप्रदान याय्गु याका बीगु याना च्वनेगु भिगु कर्मया

फल सुख दत्तं प्राणियात् तोतेगु । ३। थुगु प्रकारं दान
याना बिज्यागु पुण्यया जोरं बुद्धदिपि तरेजुया थाहां
बिज्याना महामोक्ष सुखलाना बिज्यात् । थ्वहे दान
याय्गुली जक अधिक रसयाना बिज्यागुलि थ्वसपोलपि
सकलें नरसिंह जुया बिज्यात् । हे सकल सभालोकपि !
न्हापार पूर्वजन्मे जन्मजन्म पतिकं जिनं आपालं दुष्कर
चर्या याना थःगु शरीरया लाहि आत्मा समेतं दानयाना
वया, थुगु दानपारमिताया पुण्यया बलं थुगु जन्मस मनु
ष्य मध्ये सिंह जुया जन्मजुया अनुत्तराया सम्यक्संबोधि
ज्ञान लाना बुद्ध पद लानागु जुल । अथ्यया कारणे थुगु
दान धर्म धयागु तधंगुहे खः याय्मागु हे खः धका
श्रद्धा भाव तया सुनां थुगु दानबलया खं शब्द मात्र
सुनां न्यनी उम्ह मनुष्य लिपास कारुणिकस्यपुर धयागु
असंख्य दया करुणां संयुक्त जुया शुभ कल्याण जुया
चवगु सहरे जन्म कावनी । १।

हे सकल सभा लोकपि ! हानं न्हापा न्हापा जुया
बिज्याकपि सकल बुद्ध तथागतपि शीलपारमितायागु
बलं तरे जुया बिज्यात् । गथ्येधाःसा-दशाकुशल आदि

संपूर्ण पाप कर्मयागु ज्या मत्तोगु धाक्कव तोता थःगु मने
लुया वयाच्चंगु राग, द्वेष, मोह, काम, क्रोध, लोभयात
नाशयाना चक्षु श्रोत्र घ्राण जिह्वा काय आदि दशइ न्द्रय
यात चिना थःगु बशेतया बराबर पचशीले ऋष्टशीले दश
शीले चवना केवल शील स्वभाव भिका मन इन्द्रिययात
चिना शान्त जुया चानंन्हिनं शीलपारमितास चलेयाना
बिज्यागु पुण्यया बलं बुद्ध भगवान्पिं सकलें दुःखरूपि
संसारं पार जुया महामोक्ष सुख लाना बिज्यात । हानं
थ्वहे शील पारमितास जक चलेयाय्गु अति रस याना
बिज्यागुलिं नरधयापिं मनुष्यमध्ये सिंहजुया बिज्यात । हे
सकल सभालोकपिं जिनं न्हापाया जन्मजन्मान्तर पतिकं
थ्वहे शीलपारमितास जक चलेयाना पाप तोतेगु नियमे
चवना शील स्वभाव भिका वया, शीलपारमितायागु
पुण्यया बलं थुगु जन्मे मनुष्य मध्ये सिंहजुया अनुत्तराया
सम्यक्संबोधि ज्ञान लाना भगवान् धाय्का चवना ।
अथयानिंतिं थ्व शील स्वभाव धयागु महा तःधंगु खः
झीसनं शीलयात पालन याना भिकेमागु हे खः धका
निश्चय याना श्रद्धा भावतया थुगु शीलपारमिताया खं
शब्द मात्र सुनां न्यनी उम्ह मनुष्य लिपास असंख्य
करुणा दया आपालं शील स्वभाव शुद्ध जुयाच्चंगु कारु-
णिकस्यपुर धयागु सहरे जन्म जूवनी । २।

हे सकल सभालोकपिं ? हानं न्हापा न्हापा जुया बिज्याकपिं सकल तथागतपिं क्षान्तिपारमितायागु बलं तरेजुया बिज्यात । गथ्येधाःसा-थः दाजुकिजा भाइबंधु इष्टमित्र पासाभाइपिं आदिं सकल लोकजनपिसं न्हाहा सिनंहे जूसां थःगु द्वंगु छुंहे मदेक थःत न्हागुं अपराध याःसां न्हागुं गिजेयासां बोबिया आपहें बिलधा सां दुःख कष्ट विल धाःसां उह्य मनुष्य नाप क्रोध अहंकार याना ल्वाय्गु ख्याय्गु तोता सहयाना क्षमा धर्म चवना थःके मने उत्पत्ति जुयावगु क्रोध अहंकार तंयात नाश याना न्हाहास्ये न्हागुं अपराध यासां सहयाना क्षमा याना बिज्यागु क्षान्ति पारमितायागु बलंहे जन्म मरण ज्वीम्वाक दुःखया सागरं पारजुया महामोक्ष सुखलाना बिज्यात । हानं थ्वहे सहयाना ज्वीगुलीहे जक अधिक रसयाना अभ्यासयाना बिज्यागुलिं नरमध्ये सिंहजुया बिज्यात । हे सकल सभालोकपिं न्हापा न्हापा पूर्वजन्मे जन्मजन्मान्तर पतिकं जिनं थ्वहे सहयाय्गु क्षमा धर्म चवना न्हाहास्ये न्हागु अपराध यासां सुनापं मत्वास्ये स्वैतनं प्रहार मयास्ये थःकेचबंम्ह क्रोध अहंकार तंयात ज्ञानरूपी खड्गं प्रहार याना फुका अज्ञानि जुयाचवंपिं शत्रुया उपरे दया माया तया सहयाना वयागु क्षान्ति

पारमितायागु बलं थुगु जन्मस शाक्य कुलया सिंह जुया
शाक्यमुनि तथागत धाय्का च्वन, अथ्यया कारणे थ्व
क्षान्ति धयागु सहायागु क्षमा धर्म धयागु महा तःधंगु
हे खः झोसनं धरे याय्मागु हे खः धका श्रद्धा भाब
तया सुनां थुगु क्षान्ति बलयागु शब्द मात्र न्यनी उह्य
मनुष्य लिपास क्षमा धर्म संयुक्त जुया च्वंगु कारुणि
कस्यपुर धयागु सहरे जन्म कावनी ।३।

हे सकल सभा लोकपिं ? हानं न्हापा न्हापा
जुया बिज्याकपिं सकल तथागतपिं थ्व हे बीर्य्य
पारमितायागु बलं तरे जुया बिज्यात । गथ्ये
धाःसा—थःगु चित्तं बिबेक बिचार याना कल्पना
यानागु न्हागुहे ज्या जुल धाःसांने सिद्ध याय्गु भिगु
कल्पना याना आरम्भ याय् धुंगु ज्या सिद्ध मजुवं
बिचे दिना मछ्वेगु न्हागु ज्यायागु मार वःसां सीका
सहयाना ज्या सिद्ध याय्गु हानं थःगु मने आलस्य
जुया शरीर थक जुया वै, थःगु मने थःथमंनतुं अने
अनेगु संखा लुया वै उगु बखते भित्रि दुनेयाह्य मारदल
धका सीका थ्व ज्याजा सिद्ध मयास्यें तोते मखु धका
निश्चय याना गुरु श्री त्रिरत्नयात स्मरण याना कार्य्य

सिद्ध यागुली उद्योग याना सम्पूर्ण कार्य्य सिद्ध याना
अनित्य संसारयागु दुःखं छुतेजुया जन्ममृत्यु ज्वीम्वाक
महामोक्ष सुखलाना थाहां बिज्यात । हानं थ्वहे बीर्य
पारमितास अभ्यास यागुली अधिक रसयाना बिज्या-
गुलि नरमध्ये सिंह जुया नरसिंह धायाका बिज्यात ।
हे सकल सभालोकपिं ? न्हापा न्हापा पूर्व जन्मस जन्म
जन्मान्तर पतिकं जिनं थ्व बीर्ययात धारणा याना
कार्य्य दक्व सिद्ध याना वया, हानं थ्वहे थुगु जन्मेसं
थ्व बीर्य पराक्रमयागु बलं मार पापि कृष्ण बन्धुयात
त्याका अनुत्तर सम्यक्संबोधि ज्ञान लाना बुद्धपद लानागु
जुल । अथ्येया कारणे थ्व बीर्य पारमिता धयागु
महा तःधंगु हे खः धका सीका श्रद्धा भावतया शब्द
मात्र सुनां न्यनी, उह्य मनुष्य लिपास असंख्य शुभ
कल्याणजुया दक्व बीर्यबलं पुरे जुयाच्चंगु कारुणिकस्थपुर
धयागु सहरे जन्म कावनी । ४।

हे सकल सभालोकपिं ? न्हापा न्हापा जुया बिज्या
कपिं सकल बुद्ध तथागतपिं ध्यान पारमितायागु बलंहे
तरे जुया बिज्यात । गथ्येधाःसा—श्री ३ त्रिरत्न बुद्ध
धर्म संघ आदिं गुरु डाक-डाकिनी बाह्य गुह्ययापिं
सकल ईश्वरपिनिगु ध्यान याना रात दिन समाधियोग

याना बिज्यागु सकल ईश्वरपिनिगु ध्यान समाधिया बलं सकल तथागतपिं दुःखया सागरं तरे जुया महामोक्ष सुख लाना बिज्यात । हानं थ्वहे ध्यान समाधि याय्गुली जक अधिक रस याना चलेयाना बिज्यागुलिं मनुष्य मध्ये सिंह जुया नरसिंह धाय्का बिज्यात । हे सकल सभालोकपिं ? न्हापा २ पूर्वजन्मस जन्मजन्मान्तरे जिनं थथेहे श्री त्रिरत्न आदिं सकल ईश्वरपिनिगु ध्यान समाधि याना वयागु बलं थुगु जन्मस सर्वज्ञबुद्ध धाय्के धुन । अथ्येया कारणे थुगु प्रकारं ध्यान समाधि याय्गु असंख्य महा तःधंगु हे खः शीसनं याय्मागुहे खः धका सीका श्रद्धा भावतया निश्चय याना सुनां थुगु ध्यान पारमिता गाथायागु शब्द मात्र न्यनी उह्य मनुष्ययात लिपते तःधंगु ज्ञान लाना सकल ध्यान बलं पुरे जुया च्वंगु कारुणिकस्यपुर धयागु सहरे जन्म कावनी । ५ ।

हे सकल सभालोकपिं ? हानं न्हापा न्हापा जुया बिज्यापिं सकल संबुद्ध भगवान्पिं थ्वहे प्रज्ञायागु बलं तरे जुया बिज्यात । गथ्येधाःसा—संसारे असंख्य कोटान् कोटि ज्ञानदु, थुलि मध्येस महा तःधंगु मुख्य ज्ञान धयागु बिबेक बिचार याना ज्यगु मज्यगु खःगु

मखुगु सीका ज्या याय्गु । हानं श्व संसारे हेतु प्रत्यय
जुयाच्चंगु थुगु प्रकारं हेतु निरोध ज्वीगु थुगु प्रकारं
धका सीकेगु, थुगु प्रकारं प्रवृत्ति मार्गयागु धर्म व
निवृत्ति मार्गयागु धर्म थुगु कथं धका सीकेगु । हानं
शून्यता आदिसं पूर्ण हेतु तत्त्व थथ्ये थथ्ये धका स्यगु
यात प्रज्ञा धका धाई । थुजोगु प्रज्ञायागु बलं न्हापा २
जुया बिज्यापि सकल बुद्ध भगवान्पिसं सर्वज्ञता फल
लाना जन्ममरण ज्वीम्वाक भिन्नकं दुःखरूपी अनित्य
संसारं पार जुया तरेजुया बिज्यात, महामोक्ष सुखया
खानि जुया बिज्यात । हानं श्वहे प्रज्ञाज्ञाने हे जक
अधिक रस याना कोशिश याना बिज्यागुलि नरमध्ये
सिंह जुया नरसिंह धाय्का बिज्यात । हे सकल सभा
लोकपि ? न्हापा न्हापा पूर्वजन्मे जन्मजन्मान्तर पतिकं
जिनं श्वहे बिचार बिवेक याय्गुली निपुण जुया प्रज्ञा
पारमितास चलेयाना वया, हानं थुगु जन्मेनं बोधिबृक्ष
सिमाया क्वेच्चवना खुद तक तपस्या याना श्वहे बिवेक
बिचार याय्गुली लगेजुया श्वहे प्रज्ञायागु बलं अनन्त
कोटि मारयात त्याका अनुत्तर संम्यक्संबोधि ज्ञानलाना
सर्वज्ञ जुया तथागत पद लानागु जुल । अथ्येया कारणे
श्व प्रज्ञोपाय बिवेक बिचार याय्गु ज्ञान प्रज्ञापारमिता

धयागु असंख्य महा तःधंगुहे खः थुगु महाज्ञानजा शीसनं
लाय्मागु खः धका निश्चय याना श्रद्धा भाव तथा
थुगु प्रज्ञा बलयागु खँ शब्द मात्र सुनां न्यनी, उम्ह
मनुष्य लिपास असंख्य करुणावान् जुया सर्वज्ञ ज्ञानं
पुरे जुयाच्चंगु कारुणिकस्यपुर धयागु सहरे जन्म
कावनी । ६।

हे सकल सभालोकपि ? हानं न्हापा न्हापा जुया
बिज्यापि बुद्ध भगवान्पि सकलें उपाय पारमितायागु
बलं तरे जुया बिज्यात । गथेधाःसा-श्री बिपद्द्वी
आदि दीपंकर तथागतपिसं पूर्वजन्मे जन्मजन्मान्तर
पतिकं सर्वसत्त्व प्राणिपिन्त उध्दार याय्गु स्वस्ति
कल्याण जय याय्गु उपाय सिबाय मेगु छुंहे उपाय
मया, सध्दर्म बोधिज्ञाने चलेयाय्गु उपाय जक
याना बिज्यागु बलं दुःखरूपी संसारं तरेजुया महामोक्ष
सुखलाना बिज्यात । हानं थ्वहे भिगु उपाय याय्गुली
जक न्हिथंन्हिथं उद्योग याना बिज्यागुलि नरमध्ये सिंह
जुया बिज्यात । हे सकल सभालोकपि ? जिनं न्हापा
न्हापा जन्मे जन्मजन्मातर पतिकं सत्मार्ग जक उपाय
याय्गुली उद्योग याना वयागु बलं थुगु जन्मस बोधि-

ज्ञान लाना सुगत धाय्का चवना । अथ्येया कारणे थ्व
उपाय धयागु महा तःधंगु झीसनं धर्मं फक्व चाक्व
जिक्व उपाय याय्मागु खः धका सीका श्रद्धा भाबतया
सुनां उपाय बलयागु खँ शब्द मात्र न्यनी, उह्य मनुष्य
लिपास उपाय बलं पुरे जुयाच्चंगु कारुणिकस्यपुर धयागु
सहरे जन्म कावनी । ७।

हे सकल सभालोकपि ? न्हापा २ जुया बिज्यापि
सकल बुद्धपिसं थ्वहे प्रणिधान बलया प्रभाबं तरे जुया
बिज्यात । अथ्येधाःसा—वसपोलपिसं जन्मजन्मातर
पतिकं याकनं जि अनुत्तर सम्यक्संबोधि ज्ञानलाना सर्व-
सत्त्व प्राणिपिन्त भब संसार सागरं उतरे याना उद्धार
याय् फय्मा धका जन्मजन्मान्तर पतिकं प्रणिधान
याना बिज्यागु बलं अनुत्तर सम्यक्संबोधि ज्ञान लाना
प्राणिपिन्त हित याना उत्तरे जुया महामोक्ष सुख लाना
बिज्यात । हानं थ्व प्रणिधि धयागु कल्याण याय्गुली
जक उद्योग याना बिज्यागुलि नरमध्ये सिंह स्वरूप
जुया बिज्यात । हे सकल सभालोकपि ? जिनं पूर्वजन्मे
जन्मजन्मान्तर पतिकं न्हागु धर्म याःसां थ्वहे अनुत्तर
सम्यक्संबोधि ज्ञान लाना याकनं सर्वसत्त्व प्राणिपि

उद्धार याय् फय्ना धका प्रणिधि धयागु कल्पना याना वयागु बलं धार्थेनं थुगु जन्मे जि बोधिज्ञान लाना सर्व-सत्त्व प्राणिपित्त संसार रूपि समुद्रं तरे जुया महामोक्ष सुख प्राप्त ज्वीगु धर्म उपदेश बिया धर्मया राजा धाय्का च्वना । अथ्येया कारणे थ्व प्रणिधि धयागु महा तःधंगु हे खः झीसनं प्रणिधान याय्मागु हे खः धका निश्चय याना सीका श्रद्धा भावतया सुनां थुगु प्रणिधि बलयागु खँ शब्द मात्र न्यनी, उम्ह मनुष्य लिपास आपालं गुण दया प्रणिधि बलं संयुक्त जुयाच्चंगु कारुणि कस्यपुर धयागु सहरे जन्म कावनी । ८।

हे सकल सभालोकपि ? न्हापा २ जुया बिज्यापि सकल तथागतपि थ्वहे दान, शील, क्षान्ति, बौर्य, ध्यान, प्रज्ञा, उपाय, प्रणिधि, थुलिहे जक तर्कना याना बिज्यागु बलं संसार रूपि समुद्रं भिन्नकं तरे जुया बिज्यात । हानं थ्वहे बलेजक तर्कना याना बिज्यागुलि नर धयापि मनुष्य मध्ये सिंह स्वरूप जुया बिज्यात । हे सकल सभा लोकपि ? न्हापा न्हापाया जन्मे जन्मजन्मान्तर पतिकं जिनं बल पारमितास चलेयाना वयागु बलं थुगु जन्मस बोधिज्ञान लाना श्रीघन धाय्का च्वना । अथ्येया कारणे

थुगु बल पारमिता धयागु महा तःधंगु हे खः झीसनं
याय्मागु हे खः धका सीका श्रद्धा भाबतया सुनां थुगु
बल पारमितायागु खँ शब्द मात्र न्यनी, उह्य मनुष्य
लिपास असंख्य शुभ कल्याण जुयाच्चंगु बल पारमितानं
संयुक्त जुयाच्चंगु कारुणिकस्यपुर धयागु सहरे जन्म
कावनी । ९।

हे सकल सभालोकपिं ? हानं न्हापा न्हापा जुया
बिज्यापिं सकल बुद्ध तथागतपिं ज्ञानया बलं तरेजुया
बिज्यात । गथ्येधाःसा—संकल्प बिकल्पयाक्ये रहित
जुयाच्चंगु शून्यताति शून्य महा शून्यतायागु ज्ञान लाना
थःगु आत्मायात थःथम्हं ह्यसीका सर्वज्ञ ज्ञान लाना थुगु
ज्ञानया बलं भिनकं उद्गत धयागु संसारयाक्ये पारु
जुया तरे जुया बिज्यात । हानं थ्वहे ज्ञानेजक आपालं
कोशिश याना बिज्यागुलिं नर धयापिं मनुष्य मध्ये
सिंह स्वरूप जुया बिज्यात । हे सकल सभालोकपिं ?
जिनं थ्वहे ज्ञान पारमितायागु बलं सर्वज्ञ बुद्ध धाय्का
चवना । अथ्येया कारणे थुगु ज्ञान पारमिता धयागु महा
तःधंगु हे खः धका सीका आदर भाबतया सुनां ज्ञान
बलयागु खँ शब्द मात्र न्यनी, उम्ह मनुष्य लिपास

निश्चय नं महा तःधना च्वंगु सर्वज्ञ ज्ञानं पुरे जुयाच्च्वंगु
कारुणिकस्यपुर धयागु सहरे जन्म कावनी । १० ।

थथ्ये धका सीका दान पारमिता आदि दश पार
मिता पुरे याना । क्रमलोबोधि मालभ्यःगतः
यथाक्रमथ्ये तःधंगु बोधिज्ञान लाना निर्वाण जुया मोक्ष
पद लाना बिज्याह्य वसपोलयात तथागत धाये ।

इति तृतीय पक्ष ॥ ३ ॥

ये धर्मा हेतु प्रभवा

हेतुस्तेषां तथागतः ।

ह्यवदत्तेषां च यो निरोध

एवंवादी महा श्रवण ॥

प्रवृत्ति निवृत्त्योत्मकत्वादियं ये धर्मा
गाथा - प्रवृत्ति धैगु संसारिक धर्म । निवृत्ति धैगु
निर्बाणिक धर्म । श्व ये धर्मा गाथास धयातःगु दु ।
लौकिक लोकोत्तरेषु-लौकिकसं लोकोत्तरसं ।
मंगला मंगल कार्येषु-मंगल कार्येसं अमंगल
कार्येसं । सर्वत्र योजनीया-सकल कार्येसं चले
याय्मागु । प्रवृत्तिनिवृत्ति धर्मफलप्रदत्वात्
प्रवृत्तिसं निवृत्तिसं धर्मया फल लाःगु जूयानिति ।
प्रवृत्ति निवृत्ति हेतुभूतत्वाच्च - प्रवृत्ति
धैगु निवृत्ति धैगु श्व निताया असंख्य हेतु दु । अथ
च तल्लब्ध्याख्यानं - श्व निगूलि अष्टसाहस्रिका
आदि पञ्चविंशति साहस्रिका रक्षा भगवती पुस्तक
प्यंगू खण्डया । विस्तरतया नश्चकोमि-विस्तार
छुं मतया । यल्लब्ध्याख्यानं अष्टसाहस्रिका
खण्डेपि पञ्च विंशत्यादि लक्षाभगवती

खण्डेष्वपि - गुगु व्याख्यानया कथा शून्यता ज्ञानया
 खँ अष्टसाहसिकासं धैतःगु दु, हानं पंचविंशति साह-
 सिका आदि रक्षा भगवती ग्रन्थे प्यंगू खण्डसं बिस्तार
 कनातःगु दु । तस्या प्रवृत्ति निवृत्ति इच्चैव
 व्याख्य तत्त्वात्-थुगु प्रवृत्ति निवृत्ति धैगु व्या-
 ख्यानया कथा । संक्षेप तथैव व्याख्यानं-संक्षेप
 मात्र जक कना ।

इति चतुर्थ पक्षे ॥ ४ ॥

ये धर्मा इत्यादि.....

थ्व धर्म धैगु संसारे अबिद्यानं उत्पत्तिजूगु मदुगु
बस्तु दय्केगु कल्पना याना संस्कार उत्पत्ति जुल । थुगु
प्रकारं द्वादशाकार धर्मचक्रया कथा रक्षा भगवती धैगु
तःधंगु ग्रन्थे धैतःगु दु । प्रबृत्ति निबृत्तिधयागु थ्व निगू
कथाया व्याख्यान जेतबन महा बिहारे श्री शाक्यसिंह
बुद्ध भगवानं कंगु खँ न्यना धका शिष्यपिसं धाःगु बचन
न्यना मैथलि देशया पण्डित आनन्द ब्राह्मण प्रसन्न
जुया थव सप्तशत ७०० शिष्यपिसं सहित याना जेत-
बन महा बिहारे वना त्रिरत्नया शरणे वना पाप देशना
याना पुण्यानुमोदना याना नमस्कार याना बोधिचित्त
उत्पत्ति याना थुगु प्रकारं सप्तविधानुत्तर पूजा याना
श्री शाक्यमुनि भगवानयाके प्रब्रज्या ब्रत पवन । थनंलि
श्री शाक्यसिंह भगवानं आनन्द प्रमुखं सकल शिष्ययात
प्रब्रज्या ब्रत बिया आनन्द आदि ७०० शिष्ययात भिक्षु
यात ।

इति पंचम पक्षे ॥ ५ ॥

ये धर्मा हेतु प्रभवा वायु चन्द्र कामा-
 त्मका धर्मा हेतु प्रभवा-वायु चन्द्र कामयाकै
 उत्पत्ति जूगु धर्म धयागु संसार हेतुनं उत्पत्ति जुल ।
 हेतुस्तेषां स्तथागतः । यथायेन प्रकारेण
 आगत स्तथालेन प्रकारेण गत स्तथागतं
 गुगु प्रकारं संसारस जन्म जुया वल, उगु प्रकारं संसा-
 रस मरण जुयावंगुयात हेतु स्तथागत धाय् । ह्यावद-
 त्तेषां च योनिरोधः तेषां प्रवृत्ति हेतु
 भवान्ना संसारिकाणां निरोध-थुगु प्रवृत्ति हेतु
 नं उत्पत्तिजूगु धर्म संसार चक्रथ्ये हितु हिला च्वंगु
 निरोध धाय् । थुलि मोक्ष मार्गया खँ निश्चयनं आज्ञा
 दय्कल । एवंवादी महा श्रवणः । नायक
 शाक्यराट् एवंवादी महाश्रवणः - श्रावकया
 नायक जुयाच्चंह्य शाक्यवंशया राजा श्री शाक्यसिंह
 भगवानं एवंवादी-थुगुकथं आज्ञा दय्कल ।

इति षष्ठम पक्ष ॥ ६ ॥

ये धर्मा हेतु प्रभवा हेतुस्तेषां तथागतः।
 इति पूर्वाह्नं शाक्यसिंह नोवत्तं-थुलि न्हापां-
 यागु बापु इलोक श्री शाक्यसिंह भगवानं आज्ञा दय्का
 बिज्यागु । ह्यवदत्तेषां च यो निरोध एव
 वादी महाश्रवणः॥ इति उत्तराह्नं शिष्या-
 णां स्तुतिरिति-थुलि लिपायागु बापु इलोक शिष्य
 लोकया बचन जुल । आर्यावृत्तं-थ्व ये धर्मा गाथा
 आर्यछेद धयागु ।

इति सप्तम पक्ष ॥ ७ ॥

थुलि ये धर्मा गाथाया अर्थ समाप्त जुल ।



[illegible]